

Informacije o Svjetskom humanitarnom danu

Evropska unija predano radi na zaštiti humanitarnih radnika i svake godine podržava Svjetski humanitarni dan. 19. augusta se obilježava dan kada su, 2003. godine, u bombardovanju UN-ovog sjedišta u Bagdadu poginula 22 humanitarna radnika. Na ovaj dan se odaje počast hrabrim muškarcima i ženama koji rizikuju vlastite živote pružajući pomoć ljudima u nevolji, te skreće pažnja na sve veće opasnosti sa kojima se suočavaju humanitarni radnici.

Zabrinjavajući trend

Tokom 2014. godine napadnuto je 329 humanitarnih radnika, a više od jedne trećine njih su ubijeni. Najugroženiji su humanitarni radnici koji djeluju u vlastitim državama. U 2014. godini, većina napadnutih aktivista bili su državljani pogođenih zemalja. Iako je u periodu 2013.-2014. došlo do smanjenja godišnje stope napada na humanitarne radnike, to ne znači i da je svijet postao sigurnije mjesto. Broj napada se u 2014. godini smanjio zbog toga što je usljed loše bezbjedonosne situacije manje humanitarnih radnika moglo biti upućeno u konfliktna područja. Bez neometanog i sigurnog pristupa žrtvama ne može se pružiti neophodna pomoć na spašavanju života ljudi.

Napadi na humanitarno osoblje predstavljaju kršenje [Međunarodnog humanitarnog prava](#) (IHL). To pravo je obavezujuće za sve državne i nedržavne aktere u sukobu. Njime je utvrđena odgovornost u pogledu zaštite civila i humanitarnih radnika, zaštite ugroženih grupa kao što su izbjeglice, žene i djeca, te pravo civila kojima je neophodna humanitarna pomoć.

Putem zagovaranja i humanitarnog finansiranja Evropska unija snažno promoviše poštivanje Međunarodnog humanitarnog prava (IHL) kako bi osigurala pristup humanitarnim radnicima. EU također finansira obuku na temu Međunarodnog humanitarnog prava, u kojoj učestvuje civilno i vojno osoblje uključeno u EU-ove operacije upravljanja krizama.

Historijat humanitarnog djelovanja Evrope

Evropa ima dugu i ponosnu tradiciju humanitarnog djelovanja. Ona je mjesto nastanka brojnih svjetski istaknutih humanitarnih organizacija. Evropska unija kao cjelina pruža humanitarnu pomoć više od 40 godina, a zajedno sa državama članicama ona danas predstavlja najvećeg svjetskog donatora humanitarne pomoći. Evropska solidarnost ima podršku ogromne većine građana: prema posljednjoj anketi [Eurobarometra](#), devet od deset Evropljana smatra da je važno da EU finansira humanitarnu pomoć.

U 2014. godini, Evropska komisija je, putem svog [Odjela za humanitarnu pomoć i civilnu zaštitu](#) (ECHO), u više od 80 zemalja pružila pomoć za 121 milion žrtava prirodnih i katastrofa uzrokovanih ljudskim djelovanjem. To je ostvareno sa manje od 1% ukupnog godišnjeg budžeta EU – tek nešto više od 2 eura po građaninu EU. Evropska unija nastavlja pomagati najugroženijima, uključujući žrtve sukoba u Siriji, Centralnoj Afričkoj Republici, Južnom Sudanu i Ukrajini, osobama koje su preživjele prirodne katastrofe u Aziji, ili onima koji su pogođeni virusom ebole u zapadnoj Africi. Humanitarna pomoć EU se pruža u partnerstvu sa više od 200 humanitarnih organizacija, uključujući nevladine i međunarodne organizacije, Ujedinjene nacije i društva Crvenog krsta. Pomoć Evropske unije se isključivo bazira na potrebama i temelji se na humanitarnim principima humanosti, neutralnosti, nepristrasnosti i neovisnosti.

Historijska prilika

Humanitarna zajednica će se, 23. i 24. maja 2016. godine, okupiti u Istanbulu na prvom Svjetskom humanitarnom samitu. To je historijska prilika za pronalaženje načina za bolje rješavanje humanitarnih potreba u svijetu koji se ubrzano mijenja. Bit će to prilika za povećanje djelotvornosti humanitarnog rada te bolje upravljanje rizicima kojima su izloženi humanitarni radnici. Samit će biti i prilika da se ponovo istakne posvećenost Evropske unije olakšavanju ljudske patnje, te stane uz ljude pogođene konfliktima i krizama širom svijeta. Kao najveći svjetski donator humanitarne pomoći, Evropska unija u tome ima presudnu ulogu.

Više informacija na internet stranicama:

Odjel Evropske komisije za humanitarnu pomoć i civilnu zaštitu (ECHO):

<http://ec.europa.eu/echo/index.en.htm>

Povjerenik Evropske komisije za humanitarnu pomoć i upravljanje krizama, Christos Stylianides:

<http://ec.europa.eu/commission/2014-2019/stylianides.en>

Solidarnost u akciji:

http://ec.europa.eu/echo/files/core_achievements/solidarity_in_action/index.en.htm?#intro

Baza podataka o sigurnosti humanitarnih radnika: <http://aidworkersecurity.org>

Evropska godina za razvoj: <https://europa.eu/eyd2015/en>

Kontakti sa informativnom službom:

- [Alexandre POLACK](#) (+32 2 299 06 77)
- [Daniel PUGLISI](#) (+32 2 296 91 40)